



春秋經解卷六

宋

孫

覺

撰

莊公下

十有六年春王正月夏宋人齊人衛人伐鄭

去年之冬鄭嘗侵宋宋于是報其見侵之後故率衛以伐鄭也齊桓將謀伯業求合諸侯故從宋人以伐鄭宋總三國之衆聲罪而伐人之國勢必不使微者主之然經皆書人者蓋齊桓行伯不務德政以懷來天下而專恃威武貶齊稱人則宋衛不得書爵也宋雖主兵而齊桓以伯者隨從國大力強不可逃行師之責也左氏曰諸侯伐鄭宋故也此說是

秋荆伐鄭

前年荆嘗入蔡于是又伐鄭為所以見荆蠻之強而中國之衰也不早備之將橫行于天下故二十三年來聘遂稱荆人僖元年伐鄭遂稱楚人也于此書荆言其尚可禦也冬十有二月會齊侯宋公陳侯衛侯鄭伯許男滑伯滕子同盟于幽

齊與魯為世讎春秋于莊公之交齊皆以釋怨罪之未嘗一許之也蓋聖人之意以謂不同天之讎無時可與通故雖齊襄已沒小白易世而春秋罪之如新見殺也柯之盟始平于齊而經書其事顯言公會蓋亦釋怨而交齊也至幽之盟則齊桓已伯諸侯已服魯于是時最為弱小若莊

公反仇讎之怨而棄絕盟主倔彊不從則齊桓必帥諸侯而伐我國且至于危亡而社稷不保也春秋通之以一時之權故于幽之盟沒去魯公而列序諸侯以謂莊公之為是盟非以釋怨而交齊所以同尊王室而求天下之安也父之讎則不可與之同天矣然天子之土地先君之祭祀又不可快一朝之忿怒而自取于危亡也此春秋所以曲盡人情之難而深明輕重之權也陳入春秋會盟皆在衛下于是齊桓主盟以其三恪之國進而在衛之上又其近楚之國恐其叛去亦稍懷來之耳春秋書盟者多矣未有曰同盟者二百四十二年之間其書同盟者十有八蓋盟載之書有同獎王室同卹災患之語有異于以強陵弱以

大脅小之盟故特書曰同盟也穀梁曰不言公內外寮一疑之也案莊公之交仇讎蓋非一日也但春秋欲著其法故特沒公以明雖仇讎之國若至于尊王室疆中國則雖與之盟未為過爾內外寮一疑之有何義乎左氏曰鄭成也按經書同盟所以別盟之不同者若因鄭成而謂之同又非義也公羊曰同欲也按欲有善惡若同心為惡春秋亦書之為同何以別為善乎啖子曰同盟若謂其盟詞同此說是也

邾子克卒

邾者魯附庸之國隱元年桓十七年與魯盟皆稱儀父而未有爵命至是始子者蓋自齊桓稱伯之後嘗從會盟侵

伐故進之為子爵也克者儀父之嗣君也儀父之卒不見于經者附庸之君未有爵命略而不書也左氏隱元年傳曰邾子克未王命故不書爵曰儀父貴之也按若儀父實字然春秋之于元闕道貴之乎隱之元年能與魯盟則儀父在位固已久矣至是書卒又四十五年矣據此決非一人也左氏但見儀父春秋不書其卒故以克為疑儀父此說非也

十有七年春齊人執鄭詹

春秋之法執諸侯執大夫不以其有罪無罪皆書曰人以明執人之君臣者不可以專也必受命于天王天王命之執則執之矣不命于天王而專執者皆有罪也執人之君

則係國之存亡執人之大夫則係國之治亂執有罪者猶為不可况無罪乎孟子曰今有殺人者或曰人可殺與曰可曰孰可殺之曰為士師則可以殺之殺人者固有罪矣然非士師則殺之不可他國之君他國之大夫雖有罪當執然不受於天子而執之則亦猶非士師而殺人也故春秋執人之君執人之臣者一貶之曰人以其非所執而執之行如匹夫也春秋書見執者無貶辭為蓋曰以人君之尊以大夫之位而見執于他邦則不特貶絕而罪惡見矣執鄭詹者齊侯也不曰齊侯貶之也鄭詹鄭之大夫不書氏族未命者也鄭詹事迹不見于經傳惟公穀以為佞人不知何據而言之也左氏曰鄭不朝也若鄭不朝齊而但

使詹往則詹為行人于經當書執鄭行人詹不得但曰鄭詹也穀梁曰不得不錄其本穀梁之意蓋以經為下文逃來張本爾趙子非之曰但書自齊逃來足知見報假先書乎

夏齊人殲於遂

春秋之義凡自取之者以自取為文齊嘗滅遂使人戍之為遂所殺至于殲盡齊滅人之國以戍守之而卒至于殲非遂人之罪齊人自取之爾齊不戍遂人安得齊人而殺之乎故特變例而盡之曰齊人殲于遂梁亡非人亡之也梁自亡耳鄭棄其師非他國敗之也鄭自棄耳齊人殲于遂罪之深而憫遂之滅也穀梁曰狎敵也按若齊戍能

謹為齊守則遂終滅矣若更責滅人狎敵則是教之滅人之國而謹守之也何以為訓乎

秋鄭詹自齊逃來

春秋之法義當留而宥去曰逃鄭詹為鄭之執政大臣至于見執已有罪矣然齊執詹必有以怒鄭也為詹者當仗節死義以紓一國之難可也乃苟免其一身之死遁逃而去齊于是之時桓公方伯而天下諸侯皆已服從能事之者身榮而國安違且叛之則身危而國削鄭詹既已見執因服從之猶及救其難也乃苟全其身遁逃去之詹固有罪矣然魯容罪人而納之以抗天下之盟主亦未免乎有罪也書曰鄭詹自齊逃來所以兩罪之也公羊曰何以書

甚佞也假使詹非佞人則苟免其身而遁逃亦不勝其罪矣

冬多麋

春秋之法以有為災則書有有蠹是也以無為異則書無無冰是也至于麋者常有之物雖有之不足以為異惟其多而害五穀則書之公羊曰記異也按異者非常可怪也如麋者常有之物雖多不足以為災其為災則書害也杜預曰以災故書此說是也

十有八年春王三月日有食之

春秋日食之例有書日書朔者有書日而不書朔者有日與朔皆不書者書日書朔日食正朔舊史之詳備孔子因

之以傳信也日而不朔者食不在朔或在晦或二日孔子以歷者之失因而畧之以正後世之畧也日朔皆不書者舊史所無孔子闕之以傳疑也春秋之間日食不書朔與日者惟二而已亦足以知舊史所闕者亦多也穀梁曰夜食也何休非之當矣

夏公追戎于濟西

春秋書追者皆寇已去而追之也齊人侵我西鄙公追齊師至鄆不及先言侵而後言追蓋侵事已成既去而追之公追戎于濟西不言戎之侵伐但曰追者蓋戎來為寇以我備之而遁去兵無所加但追之而已春秋書追者二皆譏之也禦戎之道來則去拒之去則勿追禦戎之道素修則

彼必不來來不為寇去則已又追之至濟西焉公不能使之不來而徒追之也齊人侵我追之至鄆我禦敵之道不修而至于見侵于其來也又無其備至已侵而去又窮追之凡追皆罪之也左氏曰不言其來諱之按文七年書狄侵我西鄙未嘗諱也公羊曰大其為中國追也按魯小國自保不暇何能為中國追乎此非也穀梁曰不使戎適于我也按戎寔至適兵無所加而去之故不曰侵我也安得曰不使之適我乎又曰為公之追大之也按書追所以罪公不能修禦之之道使之不來爾何大乎

秋有蜺冬十月

蜺含沙射人之蟲也有則為災故書有有者不宜有者也

穀梁曰一有一七此說是

十有九年春王正月夏四月秋公子結媵陳人之婦于鄆遂及齊侯宋公盟

媵者常事春秋不書陳人娶姬姓之女魯使其臣公子結媵之結行而成宋盟遂詐公命以盟齊侯宋公于是之時齊桓方伯而宋又強國公子結不終媵事而欲交歡伯主終之齊宋皆怒陳亦棄好是年之冬三國皆來伐我西鄙由公子結之遂事召之故先事媵事于鄆以見其失陳之因次書遂盟又見其召寇之迹公子結本以媵往而媵事不終及齊宋盟而齊宋皆怒是公子結一出而召三國之師為結者不勝其罪矣所以使之者猶未免乎有罪也公

子結于此書之後遂不復見陸淳以謂有遂事之美故特書之然公子結遂盟而召寇不可謂賢也或以為取之故不書卒然春秋之間惡有甚于公子結遂事而書卒者矣皆不通此蓋以其遂盟召寇特書之爾若于其卒則其不為大夫自不當書矣盟不言地盟于鄆也書及公子結為志也公羊曰大夫出疆有可以安國家利社稷則專之可也按結之遂事而致三國之師豈得謂安國利社稷乎穀梁曰辟要盟也按春秋記事安得虛加其文乎若魯自辟要盟孔子亦當考寔而書之也杜預曰結去其本職與二國盟本非公意又失媵陳之好故冬來伐此說是也

夫人姜氏如莒

婦人無專行之禮故雖父母之國惟父母在得歸寧父母
沒雖兄弟不往此許穆夫人所以許載馳之詩也衛文公
露處于曹夫人欲往唁之而義不可賦載馳以憂其憂孔
子刑詩三百餘篇得其可訓者三百有五而載馳婦人之
詩孔子取之取其父母沒雖兄弟不往也故父母之國有
時而不往况他國乎然則夫人姜氏如莒不待貶絕而罪
惡見也

冬齊人宋人陳人伐我西鄙

公子結以遂事召寇故齊宋陳皆來伐我三國有辭故曰
伐也西鄙魯之西境也春秋外師之至魯雖入其郭亦皆
曰鄙蓋鄙者言其邊遠也侵伐他國但曰某而已不曰某

鄙也魯必曰鄙者蓋我國之君寇之來者不過至于邊鄙
而已不能至于國都也我之治國之道素修禦敵之道素
備彼之來寇者乃適吾之間隙犯吾之邊鄙爾故春秋之
法于內言戰而不言敗言圍而不言入言侵言伐而不言
其至于國都所以親之尊之而備責之也不然安得二百
四十二年之間外師之侵伐我者皆莫能深入乎此蓋聖
人之意也哀八年十一年再言伐我而不言其鄙者春秋
之終而聖人之微旨也穀梁曰其言遠之何也不使難述
我國也此深于春秋者之說也

二十年春王二月夫人姜氏如莒夏齊大災

大者非常之辭災者莫知其所從來也齊大災者記其非

常且火之發不知所從來也春秋詳內而略外內之災異皆書我史故也外災之書惟周齊陳宋三數大國便近者而已蓋舉近可以明遠記大可以知小也春秋之時皇極之道汨沒不叙而天下災異不可勝記故春秋但取其著者書之爾公羊曰大災者何大瘡也按經書宋災記甲午之日宋衛陳鄭災記壬午之日豈是大瘡止于一日之間乎非也穀梁曰其志已甚也按宋災不書大豈亦甚而後志乎亦非也

秋七月冬齊人伐我

春秋之時諸侯衰我人侵陵中國齊桓行伯始與師伐之蓋齊桓有意于中國然其用師亦止書人者以其德義未著而專事兵革春秋不遽褒將有待也

二十有一年春王正月夏五月辛酉鄭伯突卒

鄭伯突自桓十五年入櫟之後遂不見入鄭之迹至莊四
年遇垂于始稱伯十四年會于鄆亦書爵而左氏于十四
年傳載厲公自櫟侵鄭之事言鄭伯于是始入于鄭而四
年稱伯者自是祭仲所立鄭子爾然則鄭伯突之出入及
篡忽而立者春秋皆不書也而史記世家及左傳皆有其
事不知何從知之但當據經為定爾四年遇于垂十四年
會于鄆所書之鄭伯皆後皆無異辭而于此始記突之卒
則是突自入櫟之後其後遂入鄭而有其國也于是始卒
爾遇垂之鄭伯安知其為鄭子乎左氏採諸國史之文共

成其書史記又因左氏皆未可據

秋七月戊戌夫人姜氏薨冬十有二月葬厲公

夫人姜氏之惡春秋載之備矣而薨葬皆詳書之無貶辭
為春秋魯史其載魯事有臣子之法蓋春秋之義所以訓
躬自厚而薄責于人也姜氏雖大惡者然魯之臣子不可
不以母禮待之故君雖不君臣不可以不臣父雖不父子
不可以不子為君父者不以臣子之故而得沒其罪為人
臣子者不以君父之惡而無禮焉此春秋以所責臣子之
備而篤忠孝之深也魯君之卒書薨夫人者君之敵故亦
書薨君薨書地所以定其常處而防禍亂之萌也夫人無

外事薨有常處不死其地明其薨不可以他處所以深責
之而謹其處耳穀梁曰夫人弗目此說是也

二十有三年春王正月肆大眚

肆放也眚過也書曰眚災肆赦易曰有災眚蓋災者自外
而至眚者由已所為無妄亦曰其匪正有眚言其不正而
後有之則眚者本以過失而有之也經曰肆大眚猶有大
過者皆赦之也夫赦宥之事古先聖王日月之所行也易
解之象曰赦過宥罪蓋解之時取其一新君子法其象則
過誤者赦之罪惡者寬宥之使之遷善而改過也民之愚
冥無知而犯于罪則君之教不至禮義之治不先爾又深
治之以刑則是驅之至于為惡而又從而殺之故聖人于

解之象欲君子法之使得自新焉亦非為一時肆青而大惡無道之人一時釋去也周禮三赦三宥之法亦以其老弱無知者爾皆為治獄之常而不施于一切也至書之言文王作罰刑茲無赦已譏後世之赦但縱失有罪之人而惠姦長惡爾春秋書肆大青者一亦譏莊公一切放縱姦惡而有意于文姜之葬也而莊公又以其母文姜嘗得罪于魯而播惡于齊至殺其夫而奔亡不已大惡無道一國之所賊惡而魯人切齒之深者于其死也莊公欲備禮葬之恐為國人所訛乃先大赦國中以悅國人之心然後舉其葬焉故正月肆大青而癸丑葬文姜聖人罪莊公不能防止其初而又縱其姦惡故書肆大青以見其失焉公羊

曰始忌青也按公羊不以肆青為赦故生此說耳非也穀梁曰為嫌天子之葬也按當是時天王衰弱何畏而不敢葬其母乎此亦非也

癸丑葬我小君文姜

文姜之惡不待貶絕而見矣而春秋書卒葬與他夫人無異辭焉所以篤臣子恩義之深而預為後世法也陸淳曰葬生者之事也臣子之禮其可虧乎此說是也

陳人殺其公子禦寇

春秋之法諸侯之國殺大夫其君殺之則稱國其國人殺之則稱人古者諸侯貢士于天子天子以為賢則命之歸國為大夫故其為諸侯之大夫則一國之賢也為天子之

大夫則天下之賢也故為賢者則不苟進其身矣天子命之則無不肖也故王道之行則列國之大夫莫不肖賢而諸侯遇之莫不有禮故其為臣之道諫行言聽則膏澤其民諫不行言不聽則違而去之以自免于禍其為大夫者不苟于其君君無禮則去為諸侯者不敢不盡禮于其臣一朝無禮則賢者去賢者去則誰與治其國家故君臣相須而天下常治也至周之衰諸侯之臣或不命于天子而當時之大夫或苟祿以活其身不命于天子則未必皆賢苟祿以全其身則不能使君遇之以禮以不賢之大夫事無禮之諸侯故君臣失道而至于君殺臣、弑君也春秋書弑君三十六以見為君者不近賢臣而自取于禍殺大夫者三十八以見為臣者不自重其身苟禍于無禮之諸侯而終見殺也又不可不較其輕重大小也故有書國書人之例稱名不稱名之別然其大概皆貶之也禦寇陳之公子不為大夫以其國君之嗣公子之貴同之大夫特書之也書陳人殺之者非陳君殺之陳國之人殺之爾不目其人賤略之也禦寇以公子之貴而見殺于國禦寇有罪矣陳之君使公子者而見殺焉亦未免乎有罪也左氏曰殺其太子禦寇按禦寇寔陳太子經當書之春秋舉重不當略去世子而但書公子也此說是也

夏五月

春秋一時無事必書首月以具四時而成編年之書也其

書首月者五十有九未有非首而書者于此書夏五月蓋
聖人因舊史所載不妄改易以傳信于後世書首月者五
十九首月之下皆當記事孔子以其事無可訓刪而去之
但存首月而已至于首月之下舊史無事而不書之者則
孔子不更書首月而但存五月也春秋書五月者惟此耳
亦可知舊史所載者繁多而首月無事者一處而已

秋七月丙申及齊高侯盟于防

春秋之法大夫不得會諸侯諸侯者一國之長而南面之
尊也大夫者諸侯之臣在彼猶在此也雖于外諸侯之國
不得抗之而會盟所以伸諸侯之尊防僭亂之萌也故魯
公而會諸侯之臣者公自屈尊而與之盟則明書公以見

其罪沒外大夫而稱之曰人不與大夫之得僭且明魯公
求與之盟也隱八年公及莒人盟于浮來所以見公屈尊
之罪而非大夫之過也高侯齊大夫于是時齊桓方伯而
其國強大以臣敵君則高侯罪也公雖有屈尊之罪然見
逼于強大比之求盟小國之臣罪差薄耳故沒公不書以
明國君之尊大夫不得抗也明書高侯以著盟公之罪焉
公羊曰諱與大夫盟按不書公所以深罪高侯謂之諱非
也穀梁之說是也

冬公如齊納幣

婚禮有六納采問名納吉納幣請期親迎惟親迎則諸侯
自行合二姓之好繼先君之後不可以不重也其他五禮

皆使大夫所以養廉遠耻而預為之嫌也春秋六禮其書者二納幣親迎其他四禮無失禮者故不書爾莊公之父桓公見弑于齊之之于魯有不同天之讐也文姜之薨在去年七月至是年之冬莊公猶在三年之喪也婚禮惟親迎自行納幣之禮大夫之事也而公又親為莊公忘君父之讐而娶讐人之子又在母三年喪內而行大夫之職書曰公如齊納幣所以見公無恩于母而不孝于父無廉耻而親納幣為一舉事而大惡者三也公穀訊納幣之非禮不罪其娶讐而喪婚以其罪惡顯著不待貶絕而可見故也

二十有三年春公至自齊

春秋凡書至者皆告廟也莊公如齊納幣于是始還而告廟故書爾公羊曰桓會不至公一陳佗也按莊公有惡則經嘗見之不可于至始見其意也經但言公至自齊安知其為陳佗乎非也

祭叔來聘

祭叔者天子之大夫也書來書字以別諸侯之臣且尊王命也祭叔之聘自周而來則是天王使之于經不言使者蓋祭叔自以私事來魯故假王命以來聘聘事雖命于天王而祭叔私之不專為聘春秋原情定罪若書天王使之則不見其私也若書祭叔來又不見其來行聘事非如祭伯之自來也以為專聘乎則寔為己私非如凡伯之受命

也聖人罪其挾公以行私故特沒去天王之使以著其罪
祭叔有罪而春秋書之與王臣者等無貶辭焉蓋春秋之
法一事無再貶之道宰渠伯糾下聘桓公弑君之人不書
其名則無以見獎惡之罪祭叔聘魯行已私不書天王使
之其罪已著又書其名則若王臣微者如宰恒之徒焉春
秋避其不名故但沒天王以見罪也穀梁曰不正其外交
故不與使按若但來交魯不得書聘書聘則是挾天子之
命而來不獨外交也不書使所以見其行私訊外交當去
聘不當去使此亦非也

夏公如齊觀社

春秋之法非宜觀而觀之者書之曰觀隱公觀魚于棠魚

卑者之事君不當觀也莊公如齊觀社國自有社而不觀
乃觀社于齊社不當觀也中庸曰明乎郊社之禮禘嘗
之義治國其如指諸掌乎故雖天子之尊必有郊諸侯之
貴必有社也郊社之禮所以教民報本而知嚴上之道焉
為諸侯者曰天子之尊而猶郊事天地則吾屬不可以不
尊天子也為臣民者曰諸侯之貴而猶報本于社稷則吾
屬不可以不事諸侯也易曰大觀在上此之謂也古者社
禮必行于春秋之上戊土日也報土之神不可以不求其
故上自天子下至于閭里之間社必以戊也春秋之夏
時之二月二月之上戊社祭之日也莊公不修己國之社
而觀齊社焉書公如齊觀社則魯社廢以國君之尊而有

社稷社稷之祭不修而觀社于他邦用見魯公之不有其社稷也穀梁曰以是為尸女也按書觀社則是非所觀而觀之見且魯社之廢尸女之說不與經合

公至自齊

觀社于齊反而告廟故書至也穀梁曰公如往時正也致月故也如往月致月有懼焉爾按春秋不以日月為例且如莊公觀社于齊而不書月得曰正乎致不書月得曰無故乎不通也

荆人來聘

荆者楚未改號之稱也曰人其臣也不言其名微之也荆蠻之國至于疆盛而來聘諸侯中國不早備之將棄中國

中國之衰而侵陵諸夏矣略之曰荆人猶言其微尚可禦也至文九年使椒來聘其國已盛而交通諸夏諸夏與之等矣春秋不復外之用見荆蠻之盛中國不能外之而中國皆荆蠻也公羊曰何以稱人始能聘也啖子非之曰若言荆來聘則是舉州皆來此說是也穀梁曰善累而後進之按春秋之大法尊君卑臣內中國外四裔安得進四裔之事乎聖人方深責中國不得不漸見外裔之強謂之進非也

公及齊侯遇于穀

簡禮而會曰遇莊公方納幣于齊而遇齊侯于穀用見公不恤國事而惟婚姻之務也

蕭叔朝公

公及齊侯過于穀蕭叔朝公于穀不書來朝不至于魯也
蕭叔者附庸之君未命者也朝者以臣事君之禮春秋之
時以大欺小以強陵弱而小國之君朝事大國類書為朝
以見強者不當受諸侯之朝而小弱者不當朝于同列也
至于大夫則不言朝未大夫無私出境之道出境則受君命
矣故大夫之來皆書其所以來之事而不言朝也至諸侯
則一國之尊而號令自出係社稷人民之重無出境見諸
侯之禮故諸侯之如諸侯則是以小事大以弱畏強而行
朝事之禮也春秋之法凡朝皆有罪至于附庸之君雖其
小弱然亦南面而為君者故其如諸侯也亦書曰朝比之

一時諸侯焉蕭者宋附庸之國于是公過齊侯于穀而蕭
叔朝焉附庸之君春秋之法書名說春秋者或以蕭叔為
字或以為名杜預謂之名蓋謂鄭黎來來朝書名而蕭叔
附庸之君不得獨書字也啖子以為字蓋謂言叔則非名
也又推而書之曰始封附庸之君書字若從杜預以為名
乎則叔者字也不可以為名若從啖子以為字乎則附庸
之君例書名鄭黎來不得曰字也謂之始封則舊封者何
以見賤而始封何貴而書字乎皆不通也按左氏有蕭叔
大心公國有蕭同叔言蕭者必以叔配之不知何故也此
可疑之事且當闕之

秋丹桓宮楹

春秋之法祖廟曰太廟太室屋壞大事于太廟是也
曰宮桓宮新宮之類是也莊公娶讐人之女以承事先君
又丹其楹以夸侈之不待貶絕而罪惡見矣穀梁訊丹楹
之非禮不知丹楹之得禮猶有罪夫娶讐人女以事先君
又盛飾先君之宮以夸侈之丹之得禮得無罪乎桓之于
莊父也不曰新宮而曰桓宮公薨至是二十餘年亦已久
成公哀公啓三年之喪新畢而其宮見災傷痛之深特曰
新宮也桓宮之成已久但記其丹之失禮足見其罪不得
更曰新也

冬十有一月曹伯射姑卒十有二月甲寅公會齊侯盟于扈
與齊盟者蓋莊公娶于齊遂欲率魯以從已故會公而
盟于扈公羊曰此日者危之我亂也按春秋不以日月為
例我亂之說有何義乎

二十有四年春王三月刻桓宮楹葬曹莊公
去年之秋既丹其楹于此又刻其楹不待貶絕而罪惡見
矣穀梁曰斥言桓宮以惡莊也按春秋但以其宮成之久
而不謂之新宮爾若丹楹刻楹在三年四年之久亦不得
曰桓宮也如昭十五年有事于武宮豈可斥言武宮而罪
昭公乎非也

夏公如齊逆女

春秋常事不書非常則書之親迎乃常事然莊公親迎而
春秋書之者以其父見弑于齊而子婚讐女是無恩于父

而盡禮于仇讐特書之以見其罪也公羊曰親迎禮也按親迎合禮則春秋何用書之此非也

秋公至自齊

莊公親迎于齊當與夫人偕至夫人未至而莊公先還告于廟春秋志其告廟之寔且罪其先夫人而至也穀梁曰先至非正此說是也

八月丁丑夫人姜氏入

春秋之法君夫人至而告廟則書至人子之禮出告反面故人君之出而反也告廟則書之曰至夫人之來魯必見于宗廟然後敢入居于公之宮亦告廟焉則書也莊公父見弑于齊而娶讎人之女以事君父之廟義不可致禮不

可合也夫人之至嘗告廟矣然聖人不與莊公以讐人之女而見其父也特變文而書之曰夫人姜氏入以明仇讐之國無時而可與通况取其女以事先君之廟乎故雖備禮而入見于廟先君必不享宗廟必不容也義不可以至于先君之廟故特沒至不書而變文曰入也公羊曰與公有所約然後入按經不書至但謂其不可至于廟耳公羊之說不近人情穀梁曰義不可受是也

戊寅大夫宗婦覲用幣

春秋之法不與婦人而專行夫人之至必書其以僞如公子遂是也歸賵歸祿必著其夫與其子之號惠公仲子僖公成風是也事繫二人者必為辭以別之齊人執鄭詹齊

人執子叔姬是也蓋婦人無專行之道必有所繫而後行所以深防禍亂而遠為之嫌也大夫宗婦則是大夫之家宗婦耳蓋以宗婦繫之大夫不與之專行也大夫之宗婦衆多非一不得書大夫之名曰某宗婦也故左氏但曰宗婦覲用幣而不言大夫是也于是之時莊公娶讐人之女而姜氏已入其國莊公欲侈大之故令大夫之宗婦覲夫人者用幣為贄幣者男子之贄非婦人之事婦人之執榛栗棗脩而已聖人罪莊公娶讐人女而又侈之至于失禮也故特書曰大夫宗婦覲用幣所以見幣非婦人之贄用者不宜用也宗婦之義杜預以為同姓大夫之婦按若同婦大夫之婦則其婦非同姓乎安得曰宗婦乎何休曰大

夫為宗子者之妻也安得一時之大夫皆為宗子此非也此蓋大夫之家宗婦爾為大夫者或非宗子而覲夫人者必皆宗婦也公羊曰宗婦者大夫之妻按一時之大夫必不皆其宗子而其妻不得皆為宗婦公羊不達古者重宗之義但見書大夫宗婦便以為大夫之妻若寔大夫之妻當書大夫之婦不得曰宗婦也穀梁曰不正其行婦道故列數之也經不書及者以大夫之宗婦爾安得便謂大夫與其妻同贄皆見乎不應悖亂禮文如此之甚也

冬我侵曹

春秋之時戎人陵暴中國無名而侵曹經書之所以見外裔之橫而中國之衰也

曹伯出奔陳

曹伯射姑卒于去年之冬至是我來侵曹之嗣君羈不安其國而出奔于陳也羈為曹之嗣君不書伯爵射姑之喪至是未暮不可稱爵也春秋之法居喪稱子羈居父喪未逾年法當稱子不曰曹子羈出奔陳者春秋深罪之也羈為曹之嗣君已嘗在^位外也不能承君先之託以嗣先君之位而奔之于陳蓋不子也春秋之法為太子而不能盡為子之道者不書子以貶之鄭忽見逐于強臣見篡于弟于其出也但書鄭忽奔衛曹羈見逐于我而見惡于赤于其出書曰曹羈出奔陳曹羈鄭忽皆嗣位未久而出奔者春秋貶之意同而文亦相類也公羊曰曹大夫也又曰

三諫不從而去之得君臣之義按經書羈之出奔而赤之歸曹其事甚著又杜預推尋左氏而為諸國作譜亦以為曹之世子也此蓋公羊因晉重耳過曹無禮曹之大夫僖負羈諫之不聽而文公其後執曹伯囚之而今其眾無入僖負羈之家遂以羈為曹大夫不知僖負羈之事去此僅四十餘年決非一人也公羊之說誤矣

赤歸于曹

赤者曹僖公也戎既侵曹逐羈出奔迎赤歸而立之也不曰曹赤者承上文羈之出奔而赤歸則其為曹赤明矣赤外有戎人之助內無曹羈之難曹方無君赤安而歸也故書赤歸于曹公穀皆曰赤郭公也按郭公自是下文非闕

赤也若赤寔郭公赤當曰郭公赤歸于曾不得書郭公于下也公穀之說皆非

郭公

郭公之說三傳皆無義說公穀為曾赤理又不通按管子載郭亡之事以為齊桓過郭問郭父老何以亡父老曰善善而惡惡也桓公又曰善善而惡惡何至于亡父老曰善善而不能去郭之所以亡也由此觀之則春秋莊二十四年齊桓已伯而管夷吾用事但見其父老而問之不知在何時耳然則郭之事迹亦嘗見于傳記也春秋書梁亡言梁之自亡也管子載郭亡之迹蓋亦曰郭自亡耳公與亡字相近疑經書郭公為郭亡也然疑誤之

事聖人闕之善善惡惡之說足以訓後世且當存之亦未可決言經誤也

二十有五年春陳侯使女叔來聘

諸侯大夫天子賜之邑使之歸國則書氏書字鄭祭仲魯單伯陳女叔是也所以別諸侯之臣尊天子之命也左氏曰嘉之故不名按春秋之時諸侯大夫來聘者衆何獨嘉女叔乎穀梁曰天子之命大夫此說是也

夏五月癸丑衛侯朔卒

按書卒義同曾伯射姑衛侯朔不書葬者魯不姓曾爾范甯推尋穀梁傳例以為失德不葬非也

六月辛未朔日有食之鼓用牲于社

書日書朔者日食正朔也春秋書日食三十六其書鼓用
牲于社惟三而已蓋皆失禮也按古者日食則鼓尚書曰
乃季秋月朔辰弗集于房瞽走鼓晉夫馳庶人走周官曰
人曰救日月則詔王鼓日食必鼓者以為日者陽之精日
食則是陰盛而勝陽社土神陰之主也伐鼓于社所以助
陽而攻陰也夏書周禮皆無用牲之禮蓋伐鼓者求以勝
陰用牲則是祈請之也將勝之而又祈之非禮也左氏曰
惟正月之朔慝未作日有食之于是用幣于社伐鼓于朝
如左氏之說則是正陽之月始忌之也凡日食之災皆為
陰盛而勝陽人君當驚戒恐懼以消復之何獨正陽之月
乎公羊曰以朱絲營社經傳皆無此禮非也穀梁曰鼓禮

也用牲非禮也此說是

伯紀歸于祀

伯姬之歸不書逆者祀子自來逆之得禮不書也春秋之
法內女歸為諸侯夫夫者則書伯姬歸于祀義同隱二年
伯姬歸于紀穀梁曰逆之道微無足道焉爾按祀子自來
合禮故不書非微者也

秋大水鼓用牲于社于門

日食必鼓者為陰侵陽其為驗甚遠而為災未見大水則
災及于物其驗已明其驗已著其災未見則聖人為伐鼓
之法以救陽且以警于人君也驗已著者則無或于鼓也
故左氏曰非日月之肯不鼓大水而鼓用牲于社于門者

皆非禮也公羊曰于社禮也穀梁曰救水以鼓衆皆非也
冬公子友如陳

春秋內臣適外諸侯行聘事者但書如其聘問之禮諸
侯常事略而不書也記其所往之事者皆非常也大夫之
聘必書之以春秋者所以見其往來之國多皆于其黨而其
行多非禮也有以私事行者有以强大行者皆非周制聘
問之常故謹而錄之也

二十有六年春公伐戎夏公至自伐戎

戎人至知無而好爭戰者也莊公不內修其國家而敵戎
之罪舉師伐之是較輕重于戎人也于其還也告至于南
春秋一書之以見其罪焉三傳無解以其事至著也

曹殺其大夫

禮曰刑不上大夫蓋大夫者一國之選而人君之所尊任
者也選之得人而任當其才故君臣相與而國家以治不
幸其選之非人而任之不見其功則放之而已蓋大夫有
罪而放之為之君者已有罪矣况刑之乎故曰刑不上大
夫也春秋之盛莫如齊桓齊桓之盟莫如葵邱之盟葵邱
之盟曰無專殺大夫蓋春秋之時諸侯之大夫多不命于
天子至其有罪又專殺之故齊桓盟以五事而專殺其一
也夫以齊桓伯者猶以專殺大夫為非則王道之行而天
下治也固無殺大夫之禮焉春秋殺大夫三十有八有書
國殺之者有書人殺之者未嘗有書爵者也蓋聖人之意

猶曰大夫者人君之所尊任而與之治國家之人也同體之相須同業以相濟求取之不精任用之不當則已有罪矣何至于殺之乎古之大夫或命于天子則不可專放春秋之大夫或命于其君命于其君則不可專殺故春秋可書國人殺之不可以君殺之也雖其君殺之者而不言蓋有之不許之也曾殺其大夫則是曾君殺之不言其爵不許其專殺大夫也春秋殺大夫三十有八而不名者三非賢之史失之也舊史失其名孔子安得而妄加之也為人臣而見殺焉則所以事之之道未備事之道未備而君無禮焉則去之可也何至于見殺乎春秋死難之臣如仇牧荀息者孔子未嘗廢之也况無事而見殺者哉公羊曰不得賢乎皆不通也

秋公會宋人齊人伐徐冬十有二月癸亥朔日有食之

會者外為志也宋人齊人者宋公齊侯也不曰宋公齊侯蓋齊桓行伯不務德以綏天下而專欲力勝諸侯春秋擇其用兵之盛者貶之也故曰齊人也宋人亦稱人而序齊上者以其主兵方貶齊侯為人不可不人宋公也三傳無解著明故也

二十有七年春公會杞伯紀于泚

伯姬前年歸杞今會公于泚三傳皆無淫惡之迹而春秋書之與夫人姜氏會于侯于禚文同而無異者蓋婦人無專行之道傳母不至不下堂而伯姬無事而會于泚安知其不為惡也傳無其事而經書之文同者犯禮之迹無異也左氏罪公行之非事而不訊伯姬亦但其一偏爾陸氏曰公及杞侯伯姬俱失正矣其說是也

夏六月公會齊侯宋公陳侯鄭伯同盟于幽

是時齊桓已伯諸侯已從同盟于幽盟書之辭同也穀梁曰衣裳之會十有一兵車之會四趙氏曰征伐則兵革修好則衣裳大例皆然何獨桓公此說是也

秋公子友如陳葬原仲

大夫無私出境之禮公子友與陳之大夫原仲有舊如陳而葬之春秋罪其私行故書曰如陳葬原仲也原諡也仲字也以字稱之者春秋之例內外大夫既沒之後不稱其名但書諡書字而已僖十五年震夷伯之廟亦是也公羊曰季子避內難春秋通其私行也穀梁曰諱出奔也按春秋未有無事而虛加其文者若公子友出奔經當據寔而書之何為諱乎公子友為大夫不能止難而去已有罪矣春秋何得為之諱乎居其位食其祿不能使之無難至有而又去之春秋乃變文以諱其奔則何以勸人死難乎公穀之說皆非也左氏曰非禮也原仲季友之舊此說是

冬杞伯姬來

春秋之例歸寧曰來大歸曰來歸惟父母在得歸寧父母沒雖兄弟不往也春秋內女適諸侯者多矣于其歸寧未嘗曰子某姬來歸寧常事無書也伯姬非莊公之義不當歸春秋以其歸之非禮故書曰杞伯姬來也左氏曰歸寧曰來按春秋內女之來惟二爾是年伯姬及僖二十八年復來爾趙子曰豈有二百四十二年內女惟兩度歸寧乎公羊曰直來此皆不知常事不書之義故為此說

莒慶來逆叔姬

禮大夫不得越境逆女所以絕外交而使一心于其國也莒慶來逆叔姬則是外交矣莊公以諸侯之尊而屈禮主

大夫婚則是失禮也莒子為君不能制其臣而使之外交諸侯則是不君矣蓋莒慶莊公莒子皆有罪也春秋之法親迎者但曰逆女而此曰叔姬者蓋不與莒慶之得逆女于我也不書叔姬之歸叔姬為大夫妻賤略之也公羊曰大夫越境逆女非禮此說是也

杞伯來朝公會齊侯于城濮

杞自入春秋常稱侯至是降而稱伯僖二十三年書杞子卒二十七年書杞子來朝文十二年書杞伯來朝杜預范甯于是見杞稱伯稱子即云為時王所黜按杞二王之後其爵最尊春秋時王室衰弱安能號令諸侯升降其爵秩乎范杜之說皆不通陸淳之徒以為當時主盟列國會諸

侯以國大小為次故國小而爵尊者降爵爵卑而國大者
進之或升或降從一時之便故杞之爵或侯或伯或子也
于是來朝稱伯者蓋齊桓興霸降爵從伯此說是也
二十有八年春王三月甲寅齊人伐衛衛人及齊人戰衛人
敗績

齊人者齊侯也以其方伯于天下而專恃兵勝故貶之曰
人衛小于齊而齊方強盛齊伐之不服而求與之戰衛人
寔欲與戰故曰衛人及齊人戰也不書所戰之地戰于衛
之國都也春秋之義師敗稱師衛敗不言師貶衛也齊桓
方興伯業以信懷諸侯以兵勝天下衛之小弱而不服至
于見伐已有罪矣德政不修而倔強不從于伯主為之侵

伐則已又驅其人而求與之戰以至弱之衛當甚強之齊
必不可勝矣以不教之卒當屢試之師必不可勝矣以衛
之無道當齊桓之方強又必不可勝矣衛不量其國之主
弱師之不教已之無道以與齊桓戰焉春秋之義敗稱師
所以深痛吾民衛侯安忍其民而驅與齊戰不以其民為
民也春秋二百四十二年之久爭事多矣未有敗而不言
師者不量其力之如何不度其德之優劣戰而至于敗未
有甚于衛者也聖人本其無愛民之心而貶之曰衛人敗
績左氏曰數之以王命取賂而還左氏終始載衛立子頹
及衛人伐周之事考于經無有也于是又曰數之以王命
終無其事者皆未可據也公羊曰衛不稱師未得乎師也

按春秋惟此一處敗績稱人未得乎師者何其少也穀梁曰微之不以師敗于人也穀梁之意蓋貶桓公爾若春秋寔貶桓公衛何稱人乎皆不通也

夏四月丁未邾子貜卒秋荆伐鄭

荆者楚未改號之稱也春秋外之故但曰荆而不曰荆人荆師也穀梁曰州舉之也穀梁不知楚未改號故妄生此說也

公會齊人宋人救鄭

是時荆為外商之疆遠至中國而伐諸侯齊桓以伯者之義率諸侯而救鄭焉齊桓攘外商尊中國可謂義矣然春秋猶書曰人未有以爵許之也春秋之義責賢者備齊桓在可責之域故春秋責之備也

冬築郛

春秋書築者七其六皆臺園也邑者惟一處爾不謂之城而謂之築左氏例曰邑曰築郛曰城春秋內城邑者二十有四豈皆有先君之廟乎此非也穀梁曰虞之非正也按虞之當曰園經不書安知其虞乎惟公羊謂之造邑陵氏從而廣之曰言城者城舊邑也言築者築新邑也蓋臺園無舊新為之者必皆曰築然則築郛者新城郛而為邑也不曰新無舊也不曰城無所因也春秋之法與作皆書所以重民力謹天時也先書築郛而下書大無麥禾則公之與作不量力可知矣

大無麥禾

莊七年書秋大水無麥苗麥苗之無大水災之也不曰大者水所不傷或有之也此書大無麥禾非常無之也無水旱災之蟲螟傷之而大無者歲凶不收也舉魯之國無收者為故曰大無也穀梁曰大者有顧之辭按七年書無麥苗亦二災也何為不言大乎此說非也

減孫辰告糴于齊

古之為國必有數歲之備雖甚豐年民食之者不過四鬴也君取之者不過什一也民之食有節君之取有度則為國三年而餘一年之蓄為國九年餘三年之蓄也為國二十七年而餘九年之蓄湯之旱至于七年堯之水至于九

而天下無飢者九年之蓄素具也天時之不可期而水旱之無常又無蓄以備之則是使民恃天而生也安得為民父母哉莊公在位二十八年雖九年之蓄可具也而莊公于其無事奪民之力使不得盡力于耕耨以其餘蓄藏以待有事又驅之戰鬪而殺傷之一年不登告糴于外春秋罪莊公在外之久蓄積無素也書曰減孫辰告糴于齊以著其困窮而告乞于外恥之也公羊之說是穀梁最深切者歟

二十有九年春新延廡

春秋凡興作皆書不以其時之得失功之當否也勞民之力費民之財皆聖人所重故也有國家者不可忘戰馬戰

之具效國必養馬馬左氏曰凡馬日中而出日中而入馬
出入之時也既者馬之所在不可以不修然莊公不務治其
國家一無麥禾告糴他國于甚歉之歲又興作以勞民蓋
莊公之新延既于春秋興作之罪又甚焉不曰新作而但
謂之新者制度規模無所增益但因其舊而新之耳左氏
曰不時也按去年之歎如此今年新既雖時無罪乎公羊
曰凶年不修穀梁以其用民力為已悉矣此二說皆是
夏鄭人侵許

按鄭稱人者將卑師少也言侵者不蔽其罪而行也左氏
于此發例曰有鐘鼓曰伐無曰侵按侵伐之例但言罪與
不言罪爾不係于鐘鼓之有無也陸淳非之當矣

秋有蜚

蜚者惡臭之蟲南方所生魯不當有者也雖曰有蜚非所
宜有而有之為異故書也公羊曰記異是也左氏曰為災
也案蜚豈為災之物又曰凡物不為災不書按春秋災異
悉書不必皆為災也鸛鶴豈能為災乎春秋何以記其來
巢也皆不通也

冬十有二月紀叔姬卒

內女歸為諸侯夫人無他惡行即書卒猶不書葬其賢行
之著者則書卒書葬以旌異之也紀叔姬為紀侯之媵法
不當書而春秋書歸于紀歸于鄭而卒葬皆詳書之者特
賢之也紀見滅于齊而紀侯去國叔姬不以紀之存亡大

小易其心也惟宗廟之是依紀季以鄒入齊而紀之宗祀不絕則叔姬又歸于鄒以其承祀事焉夫以春秋之時天下無道而婦德狼藉也而叔姬之行如此聖人安得不進之乎蓋進一叔姬而當時之淫亂無德者皆誅焉此春秋所以志叔姬之詳也穀梁曰不曰卒而曰葬閔紀之亡也案若叔姬無賢行可紀則春秋何用記其卒乎閔紀之亡非孔子作春秋為萬世之意也

城諸及防

諸防皆我邑也城者因舊邑而城之也春秋之義凡城皆記為人父母不務以德教治民而徒驅民城邑以固其城池城池治世不能去然其在春秋時則有罪矣城諸及防

所以別二邑也若曰城諸防則恐其為一邑爾亦有施功之先後先諸而後防不得曰城防及諸也穀梁曰以大及小非也左氏曰書時也按春秋具作不以時不時皆書之所以重民力而愛民財若但以時為義則得時者何用書乎如莊之三十二年一歲而築臺者三使皆得時而春秋書之可無罪乎此非也

三十年春王正月夏師次于成

春秋之義凡次皆記兵者量力而動而必中者也莊公之于紀世為婚姻之國紀亡而附庸于齊鄭紀之附庸未能下齊而自處于僻陋齊桓志欲滅之莊公以紀之故將往救鄭又畏齊而不敢也書曰師次于成所以見莊公不

量其力妄動而勞民師已成矣又畏懼而不進徒次于成
為罪之也穀梁曰不言公耻不能救鄆也按寔將卑師眾
故稱師爾謂之耻而不言則莊四年公次于郎何以不耻
也穀梁之說非

秋七月齊人降鄆

春秋書降者二降者降服之名也八年邾降于齊師不曰
齊師降城而曰邾降者是時齊魯之師相會圍邾不降
魯而自降齊爾今言齊人降鄆非鄆欲降也齊強降之耳
鄆入于齊不曰滅鄆者鄆附庸之國降齊而為附庸國無
所滅也不曰取鄆者齊之師無所加脅之以散威而鄆已
降矣不曰遷鄆者鄆不去其土地就其國服為附庸齊無

所遷也不曰齊侯而曰齊人者聖人疾齊桓將伯天下不
務德教而專恃兵革貶之曰人也春秋書降者二邾以自
降為文而鄆言疆降者非邾鄆之降有宜有不宜非齊之
于邾鄆有輕有重也邾之降不入魯不得不曰邾降也春
秋之輕重與奪惟其事之所在公羊曰不言取之為桓公
諱也按齊寔不取鄆而鄆猶如故也安得曰取乎春秋方
書齊侯為人以罪桓公安得為之諱乎

八月癸亥葬紀叔姬

內女之葬法不當書而叔姬得書葬于春秋者聖人賢之
也婦人不與外事雖其賢無事可褒獨于終始之詳以一
見為紀伯姬之葬無他賢行可書以齊侯葬之有罪故特

書之以見齊侯之惡其他內女無事著其卒葬者惟紀叔姬宋共姬耳紀叔姬之歸于鄆之志紀先君之祭祀宋共姬之傳母不至卒死于火聖人特賢二夫人之行故終始書之無遺焉公羊曰隱之穀梁曰閔紀之亡也是皆不知孔子賢二夫人之事故妄為之傳爾魯自隱閔之何與於孔子修春秋之意乎皆非也

九月庚午朔日有食之鼓用牲于社

書日書朔食正朔也日食而鼓禮也用牲非禮也春秋書鼓用牲于社所以譏用牲之非禮爾然而鼓用牲者不言鼓無以見用牲之非但曰用牲則若當時未嘗鼓也所以至于用牲者由古有日食鼓社之禮相緣而誤至于用牲

也必言鼓者以見失禮之因耳春秋書日食三十六而鼓用牲于社者三不用牲而鼓于社者蓋常事無所書耳惟其用牲非常事是以記之

冬公及齊侯遇于魯濟

簡禮而會曰遇是時齊方盛強而伯業已著齊將有事而遇公于濟也曰魯濟者杜預曰濟在齊者曰齊濟在魯者曰魯濟若但曰濟則無以分齊魯之界也

齊人伐山戎

王道衰伯者競起一匡天下以扶持王室蓋五伯之道劣于三王而有功于一時也五伯之盛莫過于齊桓而齊桓之功莫盛于北伐山戎南伐強楚而左氏記宰孔之言

曰齊侯不務德而勤遠略故北伐山戎南伐強楚而史記亦曰北伐山戎為燕開路又有齊侯割地之說公穀者皆曰齊人者齊侯也然則伐山戎者齊侯無疑也孔子論管仲之功而知免于左在蓋齊桓五伯之盛而北伐山戎又其功之著者然而春秋曰齊人伐山戎不曰齊侯也齊桓用師在春秋貶之亦已至矣于其伐山戎可以少進之矣而孔子未也齊桓之仁義非有之者假之者也假仁義者久而不變然後如其有之者也未久則變未可知也于其未可知之際遂以真有之辭許之然則仁義之道可一日而成也孟子曰亦在夫熟之而已矣蓋春秋之意也齊侯之伐山戎孔子若將許之然而未許之者齊桓之功未大

而荆楚方強也書曰齊人伐山戎所以深貶齊侯用兵之盛而勉之以伐楚也公羊曰操之為已感矣按春秋甚外四裔恐其不疎甚內中國恐其不親操之已感非春秋絀外商之意也穀梁曰愛齊侯乎山戎齊桓之功孔子之門人薄之何愛之也又愛者私情非春秋公法公穀之說皆非

三十有一年春築臺于郎

易需之象曰雲上于天需君子以飲食宴樂隨之象曰澤中有雷隨君子以嚮晦入宴息蓋君子之道有所屈則有所伸有所張則有所弛需之時君臣相須而天下治也則飲食宴樂以盡聖人之歡心隋之時威德已著而天下隨

也則優游宴息以樂乎無事聖賢所以養其神臺池園囿
宮室服御聖賢所以養其身文王之囿方七十里而靈臺
靈沼橐鹿魚具龍養身之道雖文王不廢也然庸君暗主知
養其身而不養其民此春秋所以深罪之也春秋之義興
作皆書雖城池之固門廡之急無遺焉竭民有限之力以
養無道之君聖人不與也况非民人之所急國家之所務
築臺築囿以為耳目之娛哉此其罪不待貶絕而自見公
羊曰臨民之所激浣也如莊公之治魯築臺不臨于民得
為無罪乎此特訊其淺近耳

夏四月薛伯卒築臺于薛

春築臺于即夏築臺于薛民不勝其勞也莊公務一身之

娛而勞民如此不待貶絕而罪惡見矣薛伯之卒經無其
名舊史失之孔子不妄加也

六月齊侯來獻戎捷

去年齊侯北伐山戎於是還而過魯遂以所捷獻焉春秋
齊侯用兵皆貶稱人于此獻捷顯齊侯者蓋齊大魯小齊
于魯無所畏憚若言齊人則是微者無疑也特書其爵以
見齊桓之罪齊桓伯者不務德以綏諸侯而專恃兵革遠
以伐戎已有過矣又因過魯以其伐戎之所得誇示諸侯
以示矜大因使之威服焉春秋誅齊桓矜功威魯之罪故
特書之曰齊侯來獻戎捷也孟子反不伐奔而殿將入門
策其馬曰非敢後也馬不進也孟子反全軍而歸魯賴以

免敗績之辱于其還而至魯之門也辭以馬不進焉孔子
取之取其不伐耳顏子之行事不見于傳記而孔子稱其
庶幾蓋其言曰願無伐善無施勞然則孟子反辭馬不進
得聖人之一偏顏子願無伐善得聖人之具體齊桓矜功
則亦去聖人遠矣故孟子反顏子見稱于聖人而齊桓得
罪于春秋也然則矜能而伐善者皆孔之罪人欤左氏曰
非禮公羊曰威我二說皆是穀梁曰內諸侯也按齊侯矜
功而自伐春秋方深罪之安得內而進之哉又曰內與同
不言使也按實齊自來不得曰使也安得曰內與同哉
秋築臺于秦

莊公一歲之內築臺者三其視民如何也乘君上之勢軋

疲羸之民築臺者三以為耳目之觀一身之娛春秋書之
不特見莊公之罪深有意于後世也穀梁曰虞山林川澤
之利築臺非以虞利此傳誤矣

冬不雨

春秋之法盡無之者曰無無冰是也有之而不為益者書
不不雨是也易之象陰陽和者曰雨睽之上九曰往遇雨
則吉孔子遇雨之吉羣疑亡也其不和者則曰小過之六
五曰密雲不雨孔子解之曰密雲不雨已上也然則凡雨
者皆陰陽和也不雨者皆陰陽不和也春秋不雨者七記
陰陽不和之意也人與萬物之在天地間者皆仰陰陽以
生也陰陽不和則所以仰之者無乃不遂歟故春秋之法

一時不雨則書不以其為災也異之大者不可不記故也然而不曰無雨而曰不雨者雖有之不足以為雨猶不雨則不得曰無雨也公羊曰記異此說是也

三十有二年春城小穀

小穀之地公穀皆無解惟左氏曰為管仲也杜預推尋其地以為濟北穀城縣城中有管仲井附會左氏魯為管仲城私邑之說陸淳之徒又從而廣之曰管仲德及諸侯魯為之城私邑雖非常禮亦變之正也然春秋之作所以傳後世若魯為齊城當曰城齊小穀經不言齊安知小穀之為齊乎春秋書內城者但曰城某而已其書外城又不書國何以分別乎三傳稱外城者惟小穀楚丘爾楚丘之地

雖復不明而雜見于書若小穀者惟左氏謂之管仲邑而二傳又無其事范甯注穀梁亦曰魯邑也杜預雖以管仲井為據然其地自是穀城非小穀也聖人之經不待傳而後見不應不明如此但地名疑誤亦可未決為魯邑且當存之

夏宋公齊侯遇于梁丘

宋公序齊侯上者宋為之主也穀梁曰大齊桓也按春秋書之無異文焉何以知其大乎

秋七月癸巳公子牙卒

左氏公羊載公子牙事皆以為見殺於季友然春秋書其卒無異詞也季友曷惡于未萌乃春秋之所重春秋不以

骨肉相殘責之當變文以見異意不得但書卒也春秋但記其卒安知其殺之乎若曰鴆而殺之與刃而殺之者異則許世子之不嘗藥遂得弑君之罪季友鴆公子牙而殺之與刃殺之無異也春秋之所法不可言則沒而不言君弑不地君夫人奔變為孫皆是也若春秋賢季友之殺公子牙則亦當為辭以應之不應與正卒者同例也二傳但見公子牙魯之大惡者而卒于莊公之前又季友方用事于魯疑其為季友殺之爾且當據經為正二傳說未足憑

八月癸亥公薨于路寢

曾子有疾召門弟子曰啟予足啟予手詩曰戰戰兢兢如臨深淵如履薄冰而今而後吾知免夫小子樂正子春下

堂而傷其足三月猶有憂色蓋曰父母全而生之子全而歸之夫以曾子之賢戒懼乎終身死而後知其免樂正子春一傷其高憂者三月然則二子之所重其七尺軀爾猶且恐懼如此况國君之尊有宗社之重人民之託哉名位之尊則竊伺之者衆危病之際則覬覦之者多故人君之薨必于路寢路寢者聽政之居而大臣之所在一朝而薨則國家之事社稷之守不至為姦人女子之僥倖也春秋之法薨必書地所以謹之也穀梁寢疾居正寢正也此說是冬十月己未子般卒

春秋之法君薨未逾年君稱子承祖之國繼父之業不忍有變也自稱曰子人子之心不忍其父之亡于未逾年猶

曰父在云爾稱名君之殯猶在為尸柩之前則君父之前也臣子不可不名焉此春秋之法忠孝之道也子般繼莊公而立者立未逾年而莊公未葬也乃遽見殺于公子慶父故稱子稱名而不地春秋未逾年之君書卒者三子般以弑不地而子野正卒趙子疑經闕之恐爾也穀梁曰子卒日正也不日不正也有所見則日按春秋日月例不通穀梁以卒日為正有所見則日自相反也

公子慶父如齊

慶父弑子般者弑君之罪不見于經聖人非不欲誅之也我君之弑所不可言若著慶父之罪則我君之惡顯矣若慶父者孔子深欲誅之為君父之醜隱忍為爾已弑其君

矣國內無討之者又安然如齊焉不日出奔內無所逐豈然而如齊也齊為伯主當討除弑逆以明天下之義齊容而納之齊有罪矣慶父不特誅絕而魯之臣子齊之桓公皆未免有罪也穀梁曰諱莫如深深則隱按慶父如齊非魯人逐之故不言奔爾若春秋為之諱奔則閔二年出奔莒何以不諱乎此非也

狄伐邢

春秋之時中國衰外裔憑陵中國而侵伐諸侯書之所以見中國之無人而外裔之盛強也為中國者有罪爾外裔又何責之哉

春秋經解卷七

宋

孫

覺

撰

閔公

元年春王正月

閔公繼子般之弑而立不行即位之禮春秋因不書之以見繼弑之法也左氏曰不書即位亂故也按人君即位國家之大事也雖在危亂不過禮有不具爾不應因亂遂廢其禮也公穀之說皆是

齊人救邢

去年之冬狄伐邢于是桓公救之夫以中國諸侯見伐于外裔桓公仗大義救之得伯者之正此宜在可褒之域矣

同日校

手校

然而春秋未始許之猶貶之曰齊人蓋齊桓未至于道而救邢未足以為功也齊桓不明能王道以柔遠人使之不來而區區救其侵伐則干戈之後奔命不服未及救其亂也蓋齊桓為春秋之極盛救邢又齊桓之大功聖人必于其盛者貶之為其可責而責之也穀梁曰善救邢也按救邢雖善而桓公稱人蓋其甚微之爾

夏六月辛酉葬我君莊公秋八月公及齊侯盟于落姑

閔公是時年始八歲又新大亂之後可謂君少而國家多難矣落姑之盟齊桓屈伯主之命而盟危國之幼主蓋于魯有存亡繼絕之功矣

季子來歸

左氏記季友之事以為莊公三十二年公子牙卒季友歸之也于此來歸又曰齊侯使召諸陳然則季子自二十七年如陳葬原仲其後遂不反魯于此始召之矣以為于此召之則殺公子牙者誰乎自相乖戾也蓋公子友葬原仲後嘗還魯春秋常事無所書故不記而慶父之亂常出奔然春秋不書此聖人之意也季友賢者有可以安社稷利國家之道而莊公不親信之使慶父之徒用事于內且為亂矣季友欲治之則不與于政坐視之不免于死于是違難而去也然春秋不書其出奔之迹以見其意魯方有難國人迎而歸之春秋善其反也特變文而書之曰季子來歸字而不名春秋深善之也不書至未嘗見執也不書所

自魯人迎之也陸氏曰聖人善其歸不訊其去以明變而得中進退不違道也

冬齊仲孫來

仲孫齊之大夫于時魯方有難齊侯使來窺之不書使仲孫得專使之宜因受命來魯遂寧魯難春秋嘉之特書其字曰齊仲孫來齊桓有窺魯之心而仲孫止之不言使不受君命也魯之危亡在于旦夕而仲孫存之不書其名魯人德之也春秋之法大夫外交則書之曰來隱元年祭伯來是也仲孫受命齊侯寔將窺魯而取之仲孫不受君命為辭以存魯人臣外交也春秋惡其無別特書其字以旌之陸氏曰存鄰國之美者莫過于仲孫高子此說是也公

穀皆曰仲孫者公子慶父也繫之齊外之也按春秋之所以懲亂寔魯慶父而書齊孫不惟義不明亦何以止亂乎皆非也

二年春王正月齊人遷陽

趙子曰從而臣之曰遷陽國也齊疆遷之為已附庸之國也齊稱人貶之也諸侯雖有國之大小爵之尊卑然皆受地于天子而為已同列恃其强大而遷為附庸是其罪不可勝誅矣不書曰滅宗祀復存也

夏五月乙酉吉禘于莊公

禘之說見于詩見于春秋見于論語中庸孔子之意則同而傳記諸儒之說紛紜不合不可齊一要當折衷于孔子

爾春秋之言禘曰吉禘于莊公又曰禘于太廟用致夫人
莊公之卒在前年之八月至閔二年之五月猶未三年也
書吉禘未可以吉禘而吉也斥言莊公不于太廟不配于
祖也哀姜之薨在僖之元年至于八年始禘而致之因夫
人而禘禘又致夫人也春秋書禘者二皆失非禮常譏之
則書之爾春秋之法祭祀失禮者斥言祭名因下事而書
但書曰事禘嘗烝繹失禮書之大事有事于祭無譏但因
下事爾大事于太廟躋僖公大事者禘也有事于太廟仲
遂卒于垂有事于武宮叔弓卒有事者烝嘗也禘大于烝
嘗故加大以別之烝嘗常事故但曰有爾大事無訊而躋
僖公失禮不得書禘也有事無訊而仲遂叔弓之卒非常

不得書烝嘗也蓋禘者天子諸侯審禘昭穆之祭名曰羣
公之宮合食太祖已祧之主升享于廟自天子諸侯三年
之喪則宗廟之祭皆廢不舉至于喪畢則遷親盡者之祧
致新死者之主則審別昭穆大祭于太廟于是而行禘禮
焉閔公之喪未除而莊公之主入于廟乃遽也夫人不當
致太廟未當禘用者不宜用也故亦訊之而書禘書致也
詩周頌雍之序曰雍禘太祖也長發之序也長發大禘也
雖之詩曰宣哲維人文武維后又曰既右烈考亦右文母
然則雖詩之所及止于文武爾非大禘也語曰三家者以
雍徹若雍為大禘不應三家止用于徹祭而孔子訊之亦
但曰相維辟公天子穆、奚取于三家之堂蓋三家之僭

但僭徹祭之歎不僭禘樂也若寔僭禘樂孔子罪之當更
著明不得但以天子辟公為說也長發之詩曰濟哲維商
長發其祥蓋商者契之始封也又曰相土烈之海外有截
相土契之孫也又曰帝命不違至于湯齊然則商之禘祭
自契而下也曰相土者自契而下也賢君故特舉之爾由
此觀之商之禘：契而下至于湯：以來皆常廟而禘之
者故不序也論語之言曰禘自既灌而往者吾不欲觀之
矣中庸之言曰明乎郊社之義禘嘗之禮治國其如指諸
掌乎蓋孔子之言魯禘則既灌以牲其論治國則先郊
社而後禘嘗則禘嘗之達于諸侯郊社之禮大于禘嘗亦
以明矣今叅以諸經考之則天子之禘不及于祖之自出

而諸侯之國類皆得也大傳曰禮不王不禘王者禘其祖
之所自出又祭法曰殷人禘嘗而郊冥不知禮記諸篇何
從而知不王不禘也禘大于郊也春秋之非祭祀非常失禮
者書祭祀之名故郊者天子之禮也魯諸侯不得郊而成
王妾賜魯公僭受春秋凡郊事之失禮者并郊書之以此
見郊之非禮禘嘗之祭失禮不在于祭者但曰大事有事
而已春秋不譏禘之非禘則不王不禘之說非也長發之
詩殷之大禘也而詩之所及惟曰商焉不云魯也諸儒從
而廣之曰周之禘禘魯魯之禘禘文王閟宮之詩其序魯
事備矣其辭曰皇皇后帝皇祖后稷又曰周公皇祖亦其
福女蓋魯之郊郊稷故曰后稷也魯之禘禘周公故詩曰

周公而不曰文王也若寔禘文王詩當序之不應列序魯之始出而文王獨遺也魯不祀之故不言爾然則周之禘禘稷魯之禘禘周公天子諸侯通得以行禘禮而禘小于郊無疑也禮運曰魯之郊禘非禮也周公其衰矣祭統曰成王追念周公賜之重祭郊社禘嘗是也禮記諸篇但見春秋所載郊社禘嘗之名遂以為皆天子之禮不知郊社禘嘗皆諸侯所得祭者爾魯之用天子禮樂蓋成王尊寵周公使之郊天爾其他典禮自循本爵也諸儒苟見春秋載之不復究其寔便為之說故相承致誤也但當以孔子所刪為之據爾諸儒之說不可憑也

秋八月辛丑公薨

閔公之薨不地見弑于慶父也春秋魯史臣子之禮義不可言君之弑故但曰公薨也弑君之賊討則書葬閔公之賊不討而出奔春秋不記其葬所以罪魯之臣子也穀梁曰不以討母葬子也按弑閔公者慶父爾春秋不討哀姜乃當書葬賊不討不葬母又不書葬何以分別乎穀梁之說非

九月夫人姜氏孫于邾

文姜之孫也不稱姜氏所以令齊絕之哀姜之孫也稱姜氏以明邾非姜氏父母之國其得絕之無疑焉邾容而受之為有罪爾春秋深罪邾之容他國夫人也特曰夫人姜氏孫于邾以見其不絕之罪穀梁曰諱奔也按內不言奔

乃春秋臣子之所所以待之至而責之周耳何得謂之諱乎

公子慶父出奔莒

慶父比弑二君魯之臣子不能討而殺之至今出奔也春秋之法弑君之賊不能討于當時則春秋不復見之蓋聖人疾之甚者欲其即討不欲見其復生也特書慶父之奔蓋深罪魯之臣子爾穀梁曰其曰出絕之也按魯大夫之奔皆例書出何獨慶父特言絕乎非也

冬齊高子來盟

莊公死子般閔公皆遭賊弑魯曠年無君齊桓以伯者之義使高子來盟平魯亂春秋賢高子得專使之道受命不

辭終立僖公賢君而魯難遂已不言齊侯使之所以見其能使不書其名所以善乎平亂公羊曰我無君也趙子非之曰既與魯盟即是致命若不致命如何盟乎

十有二月狄入衛

按左氏載狄人伐衛之事以為衛滅而遷都也然春秋但書曰人者蓋狄雖迫衛至于奔亡而未嘗居有其地其後衛復見于經非狄滅而取之故不曰滅爾

鄭棄其師

詩清人之序曰高克好利而不顧其君文公惡而欲遠之不能使高克將兵而禦敵于境陳其師旅翱翔河上久而不召衆散而歸高克奔陳公子素惡高克進之不以禮文

公退之不以道危國亡師之本蓋清人之詩深惡高克而
兼罪文公然春秋書之曰鄭棄其師無罪高克云者高克
之進之不以禮君惡之不能去則亦小人而已小人又何
責之哉為之君者有罪爾文公惡其臣則放之可也不放
之而乃與之衆使禦寇于境高克竟奔而師衆潰散則非
高克之罪使之者有罪爾鄭之所以為鄭以其有鄭之師
乃驅其師而去之不得歸罪高克也春秋之法自取之者
以自取為文齊人殲于遂鄭棄其師梁亡之類是也故不
以其例而變文書之蓋聖人深罪之爾

